

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-03996-2014
Broj akta: 05EN-001
Gračanica, 28.11.2014.godine

Z A P I S N I K
SA 24. SJEDNICE OPĆINSKOG VIJEĆA
GRAČANICA

Održane dana 30. 10. 2014. godine u sali za sjednice nove zgrade Općine Gračanica sa početkom u 11,00 sati.

Početu sjednice je prisustvovalo 28 članova Općinskog vijeća Gračanica.

Odsutni su: Hasan Fehratović i Hasan Puškar.

Sjednicu je otvorio i istom predsjedavao Edin Ibrišević, predsjedavajući Općinskog vijeća Gračanica zajedno sa zamjenikom Seadom Gazibegovićem i sekretarom Zehrom Mujačić.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća Gračanica, sjednici su prisustvovali i Općinski načelnik Nusret Helić, Azra Mustajbašić pomoćnik načelnika za odnose sa javnošću, šefovi službi za upravu Aida Hodžić, Senaida Šaković i Mustafa Bajić, izvjestioci Mahmutović Vanesa, Zaketović Saima i Junuzović Razija, predstavnici Plenuma Gračanica, član Etičke komisije Begović Lejla, te predstavnici sredstava informisanja.

Dat je na raspravu Zapisnik sa vanredne sjednice Općinskog vijeća Gračanica, održane dana 18. 09. 2014. godine.

Nije bilo učesnika u diskusiji i isti je usvojen jednoglasno.

Nakon toga predsjedavajući Vijeća je dao na raspravu Zapisnik sa 23. sjednice Općinskog vijeća Gračanica, održane 30. 09. 2014. godine.

Nije bilo učesnika u diskusiji i Zapisnik sa 23. Sjednice je usvojen jednoglasno.

Predsjedavajući Općinskog vijeća Gračanica Edin Ibrišević je uputio čestitke Hasić Muji, Osmanović Vehidu i Omerdić Mirzi na postignutim izbornim rezultatima na opštim izborima.

S obzirom da je već ranije Hasić Mujo podnio ostavku na mjesto člana Općinskog vijeća Gračanica i samim tim mandat je dodijeljen Ahmetašević Jasmini, pozvao je Ahmetašević Jasminu da da svečanu izjavu, uz čestitku svih vijećnika.

Pitanja i inicijative su kandidovali:

Mešić Fadil:

“Upućujem pitanje Općinskom načelniku. U majskim poplavama ove godine, naš sugrađanin Šemsudin Hajdić izgubio je pristupni put do svoje kuće, dakle naselje “Kotoruša”. Rijeka Sokoluša u tom dijelu je potpuno promijenila vodotok. Gospodine načelniče ovdje treba uraditi hitno pristupni put. Šemsudin trenutno koristi alternativni pristup koji su mu ustupile njegove komšije. Taj isti put koji su mu ustupili komšije, a vlasnici su puta su voljni ponuditi otkup puta, kako bi se taj problem pristupa kući riješio”.

Mirsad Čamdžić:

“S obzirom na sve učestalije šumske krađe, posebno u privatnim šumama, u vrijeme oktobra i novembra mjeseca, dakle pred nastupajuću zimu i probleme koje u vezi s tim imaju vlasnici šuma, općinskim službama upućujem slijedeće vijećničko pitanje i inicijativa: Šta je do sada urađeno na zaštiti od šumskih krađa u privatnim šumama, zna li se koliko se ljudi žali na ove probleme, dali iz Policijske stanice u vezi s ovim općinske službe posjeduju informaciju? Obrazloženje: Prema zvaničnim informacijama iz JP Šume TK-a svake godine se protiv šumokradica podnese oko 450 prekršajnih i 150 krivičnih prijava u vezi šumskih krađa. Lopovi šume krađu i danju i noću. Lugari koji bi zajedno sa policijom ove krađe trebali sprječavati, otkrivati i prijavljivati nadležnim tužilačkim i sudskim organima, ili nedovoljno rade svoj posao, ili su nemoćni u najezdi stotina šumokradica. Vlasnici privatnih šuma su nemoćni da zaštite svoje šume, jer se iste krađu noću, i uz verbalne i prijetnje oružjem. Sve je više prijava vlasnika šuma i kada se šumokradice otkrije i osude, od toga vlasnici šuma nemaju nikakve koristi, jer nemaju od koga naplatiti štetu. Uz vijećničko pitanje upućujem i inicijativu: da se JP Šume TK-a i Policijskoj stanici Gračanica uputi zahtjev za postavljanje punktova od strane lugara i policije, da se kontrolišu najprometnije raskrsnice, da se šume češće obilaze, kako bi se šumokradicama koliko-toliko stalo u kraj”.

Pitanja su: Kada će biti napravljen most na Lukama? Most na Lukama je uništen u nedavnim elementarnim nepogodama, a njegova sanacija traje već dugo vremena i još uvijek nije pri završetku. Ovaj most je veoma frekventan jer povezuje velika naselja a i glavni je prelaz do dvorane Luke, do škole i stadiona Bratstva. Posebno je opasno što školarci moraju zaobilaziti do alternativnog prelaza, a samim tim su ugroženi kretanjem saobraćajnicama koje su veoma frekventne i samim time opasne. Zašto su stali radovi na izgradnji puta u naselju Ritašići-Drama? Ovi radovi su nedavno počeli. Radi se o povezivanju naselja Ritašići i Hajdarovac, a građani su reagovali jer su primjetili da je došlo do zastoja i pitaju zašto? Također, ista situacija je i sa radovima u ulici Drama-Ritašići. Šta će biti sa dvoranom na Bazenu, dali su planirana sredstva za nastavak radova? Ovo pitanje se postavlja samo od sebe. Znamo da je ovo jedan od najvećih problema u našem gradu pa i na području općine. Djeca iz srednjoškolskog centra nemaju gdje obavljati nastavu. Dvorana tzv. “Partizanka” je neuslovna, dešavaju se incidenti i taj prostor je odavno trebao biti samo spomenik jednom prošlom vremenu, a naša djeca i dan danas tu izvode nastavu. O ovom problemu ne treba previše pričati, svi znamo da je potrebno rješenje. Dali postoji mogućnost da se Općina zaduži po istom sistemu kao i za dvoranu Luke, jer svjedoci smo da je taj projekt uspio i isplaćena je zadnja kreditna tranša. Iako školstvo nije u nadležnosti Općine, smatram da je bitno da se Općina uključi u rješavanje ovog problema jer sva djeca koja pohađaju srednju školu itekako jesu naša i itekako jesu naša nadležnost da se brinemo o njima. Ovdje očekujem dosta aktivnosti i od naših izabranih poslanika u višim nivoima vlasti, kojima ovom prilikom i čestitam”.

Tursunović Esad:

“Imao sam potrebu da ovo kažem i na prošloj sjednici i na predprošloj sjednici, međutim nisam izlazio iz razloga što je bila izborna kampanja. Poštovani načelniče ja mislim da ste Vi obaviješteni unazad 4-5 dana, privredni subjekat “Zeka komerc” se više puta obratio, već šesnaest mjeseci čeka urbanističku dozvolu za objekat u Lukavici. Objekat je izgrađen, pušten u funkciju, međutim za zahtjeve koje su uputili iz firme prema službi u Opštini, za šesnaest mjeseci ni jedan odgovor nisu dobili. Molim Vas da preduzmete nešto po pitanju toga, neki iz firme su čak prije tri-četiri dana zvali telefonom u službu, ali se niko nije htio javiti.

Uspjeli su dobiti na privatni telefon, ali je bukvalno, odvratno rečeno “šta me zovete na privatni telefon”. Drugo, moje pitanje se odnosi na to da mi u Gračanici imamo dva-tri nezbrinuta slučaja za koje treba naći rješenje kako bi se smjestili. Ulazimo već u zimu i njihova životna egzistencija je u pitanju, naći ćemo ih vjerovatno smrznute, kao što smo imali već dva-tri slučaja do sada u Gračanici, ako se ne smjeste. Ne znam kakva je procedura, ali ja smatram da se svi trebamo pozabaviti tim stvarima, a da se ostavimo šahtova i igrališta, jer imamo mi još dosta neriješenih stvari. Toliko”.

Almedin Devedžić:

“Ja ću ovdje u okviru vijećničkih inicijativa i pitanja prije svega izraziti jedno zadovoljstvo koje smo juče doživjeli u Mjesnoj zajednici Lukavica. Drago mi je što mogu da iznesem konstataciju da smo riješili jedan slučaj kuće koja je porušena i da smo jednu porodicu uspjeli da riješimo i uselimo u novu kuću. Zahvaljujući pripadnicima Islamske vjerske zajednice i lokalne zajednice, jedan problem je riješen i nadam se da će i ostali brzo imati priliku za izgradnju, oni naravno koji su ostali bez svojih domova. Ja svake sjednice Vijeća pokušavam da dobijem informaciju, dokle se došlo sa projektima vezano za izgradnju puta Ograđenica-Prnjavor i rješavanje pitanja vodosnabdijevanja. Ali evo imam obećanje od načelnika da je to sve u toku tako da ovaj put neću ni pitati ništa. Nadam se da će to ići svojim tokom i da će se uspjeti u vrlo kratkom roku riješiti na zadovoljstvo posebno mještana MZ Lukavica. Imam jedno pitanje za gospodina Općinskog načelnika. Zahtjev za pokrivanjem troškova električne energije u stanovima izbjeglih iz Podrinja, a u kojima su privremeno smještene 3 porodice koje su ostale bez domova u majskim prirodnim nepogodama u MZ Lukavica. Obrazloženje: Nakon majskih elementarnih nepogoda 3 porodice, koje su ostale bez svog doma, su privremeno smještene u izbjegličke zgrade, odnosno 3 stambena prostora. Od maja mjeseca u tim stanovima koristi se električna energija i do danas računi za istu nisu plaćeni, obzirom da smještene porodice nisu u mogućnosti to uraditi. S tim u vezi da nebi došlo do prekida u napajanju zbog neplaćanja računa, pozivam gore nadležne da iste plate iz Budžeta Općine Gračanica. S poštovanjem”.

Pjanić Safet:

“Imam jednu inicijativu, a odprilike ona ovako izgleda. Radi se o pomoći firmi Jadrina i zamolio bih našeg načelnika da on bude inicijator posla i ove aktivnosti da sjede sa Upravnim odborom Udruženja poslodavaca i da pokuša iznaći jednu novčanu tranšu kako bi pomogli firmi “Jadrina”. Nisam ovo htio prije iznositi jer bi to bilo branje političkih poena. Bio sam u toj firmi i direktor nema ništa protiv toga, naprotiv, bilo bi mu to i drago, pa bar da mu platimo jedan račun za struju ili dva računa, nije bitno. Dakle, predlažem da to načelnik uradi brzo i na adekvatan način kako bi se pomoglo toj firmi. Ovo iniciram jer je direktor ogorčen na više nivoe vlasti, pa evo da mi pokažemo solidarnost i mislim da bi to bila zaista lijepa gesta. U tom bih zamolio načelnika, a ne bježim uopšte od svog učešća da u tom paketu pomognemo i firmi “Grafopak” i “Fering”, pa bar ako može da damo pakete pred Novu godinu, jer evo ide Nova godina a ljudi su u takvoj situaciji kakvoj jesu pa nebi bilo loše da i njih pomognemo. Toliko”.

Esma Pašić:

“Poštovano radno predsjedništvo, poštovani načelnice, kolegice i kolege vijećnici, mediji i ostali gosti sve vas srdačno pozdravljam. Za današnju sjednicu predlažem vijećničku inicijativu, a odnosi se na to da predlažem da se formira jedna parlamentarna komisija koju će sačinjavati predstavnici svih političkih subjekata i da izvrše obilazak ulice Hajrudina Džebe Bajbage u Gračanici. Obrazloženje: Pomenuti putni pravac počinje od bivšeg poslovnog objekta Mirna i izlazi na magistralni put Doboj-Tuzla. Put je zaista u katastrofalnom stanju i stanovništvo u tom dijelu čak u čizmama dolazi do svojih stambenih objekata. Brdske i oborinske vode posljednjim poplavama su uništile taj put, čak u nekim dijelovima je dio puta pomjeren u privatne parcele. Bilo bi dobro da se pomenuti putni pravac sanira, a samim tim bi se riješilo i pitanje površinskih,

odnosno odvodnih voda. Takođe bih iskoristila priliku da čestitam našim poslanicima koji su izabrani u Kantonalnu Skupštinu i u Federalni parlament”.

Sulejmanović Osman:

“Imam jednu inicijativu prema načelniku i službama. Ta inicijativa se ustvari ponavlja i glasi: Zašto se ne dovršava davno započeta aktivnost oko elektronske naplate parkinga u gradu. Obrazloženje: Svakodnevno smo svjedoci dnevnih saobraćajnih gužvi u gradu, imamo nekontrolisano kretanje pješaka (učenika) na raskrscima i pješačkim prelazima, imamo polu uređeno ili neuređeno stanje u korištenju parking prostora. Predlažem načelniku i nadležnim službama da po hitnom postupku izvrše postavljanje parking automata, naravno uz donošenje potrebnih akata za organizaciju parking službe”.

Osmić Mirsada:

“U ime Kluba Vijećnika SDP-a i u svoje lično ime upućujem inicijativu Općini Gračanica, a odnosi se na: Kupovinu, odnosno nabavku i postavljanje opreme klizališta na otvorenom za mlade i djecu koje bi bilo smješteno na Rukometnom igralištu u Gračanici. Možda to danas zvuči nerealno i nekome smiješno, ali uz sve aktivnosti oko infrastrukture i stvaranja uslova za život građana, moramo razmišljati i o društvenom i zabavnom životu u gradu. Stoga vođena i prijedlozima građana upućujem inicijativu čija bi realizacija mogla zaživjeti naredne zimske sezone. Obzirom na okolnosti u kojima se nalazi Budžet Općine, jedan dio sredstava može se obezbijediti putem javnih poziva domaćih institucija ili Međunarodnog nevladinog sektora, a predlažem da nosilac ovog projekta bude Sportski savez Općine. Smatram da je ovo idealan način da se mladi i djeca naše općine i regije, zabave i korisno iskoriste slobodno vrijeme, a čime grad u zimskom periodu nebi živio zimskim snom nekih 3 ili 4 mjeseca”.

Krajinović Nihad:

“Prije nego postavim pitanje i uputim inicijativu, konstatirao bih da nikada nisam dobio odgovore na svoja prethodno postavljena pitanja a vezana za zgradu “osmijeh” u naselju Javor i sprovođenje odluke o uređenju centralne ulice u gradu. Zaista ne bih da postavljam pitanja pro forme jer mi je stalo da ona imaju svoj rezultat. Vrijeme predizbornih dodvoravanja je prošlo i vrijeme je da se vratimo stvarnim životnim pitanjima. Moje pitanje se odnosi na problem priključaka na kanalizacionu mrežu vlasnicima objekata koji su ispunili sve potrebne preduslove, uplatili takse, regulisali dokumentaciju i dozvole, no priključaka još uvijek nema što im usporava useljenje u objekte. Takav slučaj imaju sugrađani na Ritašićima u naselju Drama koji pitaju ko je odgovoran da ovo riješi. A inicijativu upućujem predsjedništvu OV da u pripremi plana rada Vijeća za narednu godinu, ili kao tačku dnevnog reda ili organizaciju posebne javne rasprave uvrsti tačku o stanju objekata i lokacija od općeg društvenog značaja koje danas propadaju i ne služe ničemu. Jedan od primjera na koje se građani žale je Dom izviđača na Gaju oko kojeg se prema njihovim riječima okupljaju sumnjiva lica a isti slučaj je i sa dvoranom na Bazenu. Ponovo ističem zgradu Osmijeh čiji se status i vlasnička struktura ne znaju. Zaista molim da povedemo više računa o društvenoj svojini i njenoj upotrebi. Trebaju li nam ti objekti i lokacije i na koji način ih možemo vratiti građanima na upotrebu. I dodao bih još jednu inicijativu u vezi slučaja za kojeg sam doznao pred početak sjednice. A u pitanju je produženje vozačkih dozvola, licima čiji su dosijei odnosno izvorna dokumenta stradala u gradovima koji su poplavljeni tipa Doboj i Maglaj. MUP Tuzlanskog kantona ne izdaje vozačke dozvole, odnosno ne produžava ih osobama koje su ih imale, obrazlažući da ne postoje dosijei odnosno da nema na osnovu čega produžiti vozačku dozvolu, tako da se ljudi nalaze u problemu, a posebno oni kojima je posao vezan za vozačku dozvolu. Ja ću evo malo zloupotrijebiti svoje radno mjesto, dakle mi smo iz radija inicirali ovo pitanje prema MUP-u i pokušali da dođemo do odgovora. Međutim, još uvijek ništa nismo dobili, pa evo zaista mi moramo stati iza svojih građana, i da Vijeće i načelnik pozovu MUP kako bi se riješila ova situacija”.

Selimović Senad:

“Želim se zahvaliti Općinskom načelniku za odgovore na moja postavljena pitanja sa 22. sjednice Općinskog vijeća. Procedura oko izgradnje bazena za vodu u naselju Šabići – MZ Trnovci je završena. Za par dana bi trebala početi izgradnja bazena za vodu. Sredstva za vodosnabdijevanje u naselju Kulovići – MZ Džakule, u iznosu od 15.000 KM su u Nacrtu Budžeta Općine Gračanica za 2015.godinu i nadam se da će se to i realizirati. MZ Trnovci je 10.07.2013.godine dobila saglasnost od Elektrodistribucije Tuzla za povećanje priključne snage električne energije (trofazno brojilo). Nadam se da će se i to riješiti do kraja ove godine (iz sredstava za održavanje javne rasvjete). Veliko hvala”. Vijećnička inicijativa ide prema načelniku: Tražim da se što hitnije izvrši saniranje putnog pravca preko Monja. Putni pravac je u jako teškom stanju, zima je na pragu. Da uradimo ono što možemo kako bi se saobraćaj odvijao nesmetano”.

Sead Gazibegović:

“Već smo čuli iz nekih inicijativa kolega, predhodnika pa bi bilo dobro malo vratiti osmijeha na lica ljudima, poslije ovih teških poplava, klizišta i svega, kroz eventualno klizalište i nešto još od takvih stvari. Prvi korak čini mi se da se vrati život u centar grada, ako ga budemo mogli vratiti. Svi imamo primjedbe i jeste da konačno kvalitetno riješimo rasvjetu u centru grada. Štedne sijalice koje imamo na rasvjetnim tijelima u centru, mislim da više nemaju smisla da se to tu zadrži. U sklopu inicijative za kvalitetno rješavanje rasvjete centralne ulice, pješačke zone, znate na što mislim priključio bih i proširenje kvalitetnog rješenja rasvjete na opštinski park. Mi imamo izuzetno lijep park i to danju vrlo lijepo djeluje, na ponos svima nama. U svim gradovima opštinske zgrade, gradske kuće kako to zovu, uglavnom su najuređenije zgrade, najbolje osvijetljene i mislim da je došao vakat da u okviru sredstava koja imamo za rasvjetu da to uradimo i ispred ove zgrade sa posebnim akcentom na kvalitetniju rasvjetu Centralnog spomen obilježja koje je sve češće u mraku i rasvjetu pješačke staze, pristupne pješačke staze pored Sokoluše, prema srednjoškolskom centru. Nadam se da će to do proljeća biti odrađeno i da ćemo na proljeće, ako ne ove zime to već imati i u realizaciji”.

Ne izlazeći za govornicu Pjanić Safet je postavio pitanje načelniku, zašto nije bio u emisiji televizije, kao opština koja je stradala u elementarnim nepogodama.

Odgovor je dao Općinski načelnik.

Predsjedavajući Vijeća je dao na raspravu predloženi dnevni red 24. Sjednice Općinskog vijeća.

Za diskusiju se javio Općinski načelnik Nusret Helić:

“Mogu li ja prije odgovoriti na neka pitanja koja su kandidovana, a više zbog informisanja. Evo prvo pitanje most na Lukama. Potpisan je ugovor i da znate vrijednost je negdje 48.000,00 KM. Radit će Kompanija Širbegović. Ovih dana će se dati avans i krenut će se sa izgradnjom. Vidjeli ste da smo digli nivo, projekat je urađen, a po ugovoru je čini mi se dvadeset dana rok i dobit ćemo kvalitetan most za komunikaciju. Zašto je stala gradnja na Drami. Rađen je potporni zid pa izvođač otišao na drugo radilište. Natjerat ćemo ga sad da se radi, jer zbog prevelike zauzetosti stoje nam i neki putevi na kojima možemo imati poslije problema. Mi ćemo već sutra imati sa izvođačem razgovore, bojimo se za ove velike projekte koji su iz sredstava GSM-a, da ne ostanemo bez njih. Dakle, uradit ćemo sve da i to riješimo. Kad je u pitanju ovo što je Tursunović pitao vezano za firmu “Zeka komerc”, on je jučer bio kod mene, razgovarali smo o nekim pitanjima. Dobili su nalog, a mi ćemo u toku slijedeće sedmice vidjeti, zbog čega to toliko traje. Dva su predmeta, upotrebna dozvola i urbanistička za neki objekat i valja vidjeti šta je. Vjerovatno su bili razlozi, jer su mnogi ljudi bili angažovani oko ovih elementarnih nepogoda. Ne smiju privredni subjekti čekati na to i onaj ako bude kriv odgovarat će disciplinski. Rekli smo, a i u Zakonu stoji, za ove koji su ostali bez domova, da možemo rješavati stambeno zbrinjavanje,

plaćanje zakupnine, tako i za trošak električne energije. Neka ti računi dođu do nas, a one osobe koje su smještene po tom osnovu, za njih će Općina platiti. Ovo što je Pjanić iznio, ja prihvatam inicijativu, valja nešto učiniti za Jadrinu. Evo ići ćemo i tim putem, možda ćemo i mi nešto iz budžetske rezerve pokušati intervenisati. Na ova druga pitanja dobit ćete odgovor. Ja imam prijedlog za dopunu dnevnog reda. Mislim da je objektivno da uvrstimo još jednu tačku dnevnog reda i to "Odluka o prenosu prava vlasništva na nekretninama za one koji su ostali bez svojih domova".

Rahim Gadžić je u ime Kluba vijećnika prije izjašnjavanja o dnevnom redu, zatražio pauzu radi konsultacija.

Nakon pauze predsjedavajući Općinskog vijeća Gračanica Edin Ibrišević je predložio da se kao tačka 4 uvrsti u dnevni red Odluka koju je predložio Općinski načelnik, te pročitao dnevni red koji glasi:

D N E V N I R E D:

1. IZVJEŠTAJ O IZVRŠENJU BUDŽETA OPĆINE GRAČANICA ZA PERIOD 01. 01. – 30. 09. 2014. GODINE..
2. NACRT-BUDŽET OPĆINE GRAČANICA ZA 2015. GODINU.
3. NACRT-ODLUKA O IZVRŠAVANJU BUDŽETA OPĆINE GRAČANICA ZA 2015. GODINU.
4. ODLUKA O PRIJENOSU PRAVA VLASNIŠTVA NA NEKRETNINAMA U VLASNIŠTVU OPĆINE GRAČANICA.
5. ODLUKA O PROMJENI STATUSA NEPOKRETNOSTI U OPŠTOJ UPOTREBI (K.O. GRAČANICA).
6. ODLUKA O PROMJENI STATUSA NEPOKRETNOSTI U OPŠTOJ UPOTREBI (K.O. MALEŠIĆI).
7. RAZRJEŠENJE I IMENOVANJE ČLANA I PREDSJEDNIKA KOMISIJE ZA BUDŽET.
8. AŽURIRANJE PROGRAMA KAPITALNIH INVESTICIJA OPĆINE GRAČANICA 2010. – 2014. GODINA, U 2014. GODINI.

Dnevni red je usvojen jednoglasno.

TAČKA 1.

IZVJEŠTAJ O IZVRŠENJU BUDŽETA OPĆINE GRAČANICA ZA PERIOD 01. 01. – 30. 09. 2014. GODINE..

Uvodno obrazloženje po prvoj tački dnevnog reda dao je Općinski načelnik Nusret Helić:

„ Pošto je ovo prva sjednica poslije održanih izbora, čestitam izbornim pobjednicima i vijećnicima koji su osvojili mandate u Kantonu i Federaciji BiH i želim da se što prije uspostavi vlast i počne funkcionisati u interesu svih građana. Vama iz naše općine koji ste ušli u Kantonalne odnosno Federalne institucije želim da se što kvalitetnije borite i za naše projekte i potrebe građana.

Vi ste dobili Izvještaj o izvršenju budžeta općine za devet mjeseci ove godine iz koga ste mogli vidjeti kretanje prihoda i rashoda i ostvarenje pojedinih stavki.

Takođe ste dobili detaljno obrazloženje.

Zbog toga ću ja samo podsjetiti na neke elemente iz izvršenja.

Budžet za 2014. godinu planiran je u iznosu od 12.224.827 KM i sastojao se od:

- prihoda u iznosu od 9.753.000 KM
- primitaka u iznosu od 1.680.000 KM
- viška prihoda iz ranijeg perioda 791.827 KM
- izdataka u iznosu od 11.500 KM
- otplata anuiteta u iznosu od 724.500 KM.

U izvještajnom periodu budžet je ostvaren u iznosu od 8.154.222 KM i to:

- prihodi i primitci 8.154.222 KM
- izdaci u iznosu od 6.358.536 KM
- otplata duga 373.590 KM
- višak prihoda nad rashodima 1.4222.096 KM
- višak prihoda iz ranijeg perioda 791.827 KM, ili ukupan višak (suficit) je iznosio 2.213.923 KM.

Šta je karakteristično za prihode: Da su se uglavnom ostvarili u planiranim veličinama, sem nešto manjeg ostvarenja poreza građana (porez na imovinu, porez na promet nepokretnosti i dr.).

Kod neporeznih prihoda nešto manje ostvarenje je na prihodima od koncesija, rente, zakupa javnih površina, od sportske sale i dr. nešto našto se i nije moglo uticati, odnosno na što mi nismo mogli uticati. Kada su u pitanju grantovi - oni su ostvareni u većem obimu, a radi se o sredstvima viših nivoa vlasti i donacijama za otklanjanje posledica elementarnih nepogoda.

Zato su podbacili kapitalni grantovi viših nivoa vlasti i ostvareni su u minimalnim iznosima.

Vidjeli ste da su ukupni izdaci ostvareni sa 73,92 %.

Tekući izdaci u koje spadaju plaće i naknade, materijalni troškovi, izdaci za energiju, komunalne usluge, grantovi neprofitnih organizacija, vanjski korisnici i dr. ostvareni su u gotovo planiranim veličinama. Takođe i otplata anuiteta.

Manje su ostvareni kapitalni izdaci jer nisu bili završeni tenderi ili su bili u toku, tako da je izvršenje na ovim izdacima već promijenjeno tokom ovog mjeseca.

Suficit koji je iskazan odnosi se uglavnom na namjenska i nerealizovana sredstva viših nivoa vlasti za koja su procedure u toku i sredstva za kapitalne izdatke za projekte koji se rade ili počinju po provedenim procedurama.

Period koji je iza nas, uglavnom je bio fokusiran na otklanjanje posledica elementarnih nepogoda, što se vidi iz ostvarenja budžeta. Sanacija nekih klizišta je i dalje u toku, a otvaraju se i nova kad su u pitanju putevi. Zbog toga će biti potrebe da se već slijedeći mjesec pripremi rebalans uz nadu da ćemo i pored svih problema izbjeći budžetski deficit.

Tu su i predstavnici Službe za budžet, ako bude potrebe za dodatnim pojašnjenjima i da odgovore na postavljena pitanja. Dakle, u skladu sa novim zakonima o budžetima sad se i kvartalno podnosi izvještaj i zbog toga je izvještaj za devet mjeseci pred vama. Hvala“.

Učesnici u diskusiji su:

Gadžić Rahim:

„Ja ću u ime Kluba SDA. Klub SDA, znajući u kakvoj situaciji je Općina Gračanica poslije zadnjih elementarnih nepogoda, poplava, klizišta i slično, i kakvo je kretanje budžeta. Međutim, mi tražimo ovdje da se u narednom periodu, pošto je putni pravac preko Monja kojim gravitira pet mjesnih zajednica, da se nešto nužno i pod hitno uradi. Znajući da regionalni put Doborovci-Srnice je u teškoj situaciji i autobusi nebi mogli prolaziti u zimskom periodu, i naši učenici vjerovatno nebi mogli nastaviti školovanje u tom narednom zimskom periodu. Vršene su povremene sanacije na prevoju Monja, međutim do zime i prvih padavina snijega morao bi se uraditi nešto veći zahvat, da obezbijedimo normalan prelaz preko tog puta. Druga stvar, u nekoliko navrata ovdje smo mi vijećnici postavljali pitanje, mi znamo da nije u nadležnosti regionalni put Gračanica-Srnice, a evo znamo da imamo oštećenja na tom regionalnom putu, tražimo da Opštinsko vijeće i načelnik, zajedno upute pod hitno jednu urgenciju direkciji puteva TK u kome će se tražiti da do zime moraju

razriješiti odrone na putu koji su u Pašalićima i na drugim lokacijama. Znamo da će se jako teško moći odvijati saobraćaj u zimskom periodu“.

Begović Rukija:

„Evo ja imam jedno pitanje vezano za izvršenje budžeta, a evo Rahim je već rekao vezano za puteve, a ja sam više puta aplicirala za to. Sada imam pitanje dokle je došla sanacija kuća koje su stradale u klizištima? Evo vidim da je u Lukavici već se počelo rješavati. Interesuje me jer ima još mjesnih zajednica gdje su ljudi ostali bez svojih domova. Kako se planira tu rješavati, i molim načelnika i sve prisutne da se svi koji su u mogućnosti maksimalno potrudite da nađemo sredstva i način, kako bi svi građani koji su ostali bez svojih domova, mogli imati privremeni krov nad glavom. Toliko“.

Selimović Senad:

„Mjesna zajednica Trnovci je gospodine Načelniče, još u junu mjesecu 2014.godine poslala dopis Komisiji za utvrđivanje prioriteta za sanaciju nastalih šteta od poplava i klizišta na području općine Gračanica, tako da je u MZ Trnovci potrebno poslati mašinu, bager kako bi se poudarali šipovi pored cesta u određenim naseljima ili pored ugroženih stambenih objekata, da spriječimo dalja klizišta. Šipovi su spremni i nalaze se tamo pored cesta u određenim naseljima. Zato je potrebno da ta mašina dođe i bar dan dva ili već koliko kako bi smo to riješili, da spriječimo dalja klizišta. Isto tako potrebno nam je par kamiona rizle, kako bi to pokušali zaštititi, jer ide zima, kada će i Zimska služba razgrtati snijeg što znači da se to treba uraditi“.

Safet Pjanić:

„Mislim da, ovo što je načelnik iznio kad je u pitanju izvršenje budžeta, dosta je korektno, dosta dobro, obzirom na situaciju koju imamo, a čeka nas zaista još puno posla. Evo vidimo da je rashodovna strana puno manja i da je ostalo još puno projekata i svega drugog gdje treba da se interveniše. Ja bih samo ovdje rekao par stvari, da načelnik pokuša da interveniše tamo gdje je to najneophodnije, jer kad je u pitanju sanacija klizišta, trebalo bi jedan čitav budžet da se ovo sve sanira, s obzirom koliko ima štete. Tu zaista moramo biti razboriti jer šteta je na sve strane. Tako da bih zamolio da u tom dijelu budemo maksimalno racionalni i da se interveniše gdje je najpotrebnije. Drugo, tamo sam u izvršenju budžeta vidio da u Mjesnoj zajednici Lendići ništa nije urađeno za devet mjeseci pa bih molio da ta Mjesna zajednica ne bude, što kažu, na repu događaja, a da ne nabrajam sam gdje se sve šta uradilo. Ako počnem nabrajati, neće biti uredu. Ima stvari koje se da kažem, ponavljaju, a u tom dijelu Mjesne zajednice ima dosta problema i molio bih kad je ta MZ u pitanju, da se bilo šta uradi jer je tamo dosta njiva postalo šljunkare. Molio bih načelnika i službe da se ponašaju racionalno, maksimalno štedljivo jer je moja procjena da će i nama brzo doći scenario iz Srbije, gdje ćemo zaista udarati po svemu što je luksuz, što je javna potrošnja, jer se neće moći sanirati ni naš budžet ukoliko se zaista ne budemo maksimalno štedljivo ponašali. Prihoda će biti sve manje i manje, pogotovo ovih prihoda koji su direktni za našu općinu. Stat će i grantovi, stat će i potpore, a onda će doći do tzv. suhih prihoda koje će biti vrlo teško naplatiti. Ja kao vijećnik podržajem u svakom slučaju izvršenje budžeta“.

Općinski načelnik Nusret Helić:

„Opravdano vijećnici traže intervencije. Teško je u ovoj situaciji, kakva je, na sve brzo odgovoriti. Vjerujte da se trudimo i da radimo tamo gdje i nemamo dovoljno sredstava ali ja se nikad ne bojim. Ako smo čestito uradili nešto što je potrebno za građane mislim da ćemo u ovom periodu što je do kraja godine uspjeti naći sredstva. Kad je u pitanju ovo što je Begovićka rekla, evo vidjeli ste da je raspisan konkurs. Sad gradimo četiri kuće, odnosno obezbijedena su sredstva za četiri kuće. I pravimo rang listu. Prvih četiri će dobiti po 37.500,00 jer su to pravila Fonda, a sledeći dolaze na red, kako obezbjeđujemo sredstva. Mi smo podijelili to da znate, vjerovatno ste informisani sto hiljada, odnosno po 3.000,00 ili 2.000,00 i neki su sa tim sredstvima i započeli i uspjeti uz još neka manja sredstva kao što je u Gornjoj Orahovici,

što treba za dvije-tri kuće i riješili smo. Dakle, napravljeni su zaista veliki pomaci, a sve je to izgledalo sporo. Evo i oko placeva, ljudi da su imali placeve, prije tri mjeseca, već bi mi imali kuće do ploče. Pomogao bi komšija, prenijeli bi nešto sa starih objekata. Ali ima nešto što nam diriguju pravila Fonda. Fond kaže samo četiri kuće praviti, ništa to dijeliti. Mi to moramo ispoštovati, i krenulo se i nadam se da će to sada ići daleko brže nego što je do sada. Monj mi održavamo i održavat ćemo i dalje prohodnost, a znate da čekamo na sto pedeset hiljada iz kredita Svjetske banke. Oni provode procedure, čime bi sanirali uglavnom, veći dio Monja. Do tad mi prohodnost obezbjeđujemo, i tako će biti i dalje. Takvo će biti i za ove neke druge mjesne zajednice uključujući i ovo posipanje rizle. Mi smo dobili zahtjev, evo iz Doborovaca, juče iz Piskavice, ogromna su sredstva koja se traže ali ćemo uz minimalne sanacije uraditi da bi mogli što kažu, ići i đaci u školu i sl. Zasad su nam sve saobraćajnice prohodne. Evo prije dva dana smo Džafiće riješili klizište i to je 15.000,00. U Rašljevi se rade dva i uspostavljena je prohodnost, a za Avdiće koje je do sada najteže, čekamo iz kredita od Svjetske banke i požurujemo. To je projekat od 100.000,00 KM čime ćemo imati gotovo zaštićene objekte koji su ugroženi. Zaista smo na terenu, a to što je pritisak velik, ja razumijem ljude ne možete riješiti. Prvo nemate kapaciteta finansijski da riješite sve i najmanje projekte, ali vjerujte da ćemo zajedno sa službama biti mobilni da rješavamo. Evo ovih dana idu prema mjesnim zajednicama, tamo gdje su poplavljenе kuće, one boje zaštitne, uz svaki objekat doći će po vreća brašna, a to je ono sa čime raspoložemo, i to odmah šaljemo prema MZ. Ovo Pjaniću, za Lendiće, malo je bio zastoj predsjednik MZ je bio kandidovao put da se pravi odozdo prema gore, drugi se nisu složili. Onda je došao zahtjev da se vrši popravka puta od ovog skretanja prema Malešićima, za Lendiće čitavom dužinom i da se kanali rade, eno javne procedure su na stolu. Dakle u to ćemo utrošiti ona sredstva koja su planirana u budžetu. Ono što ne prođe prenosimo u narednu godinu. Evo toliko i hvala“.

Tursunović Esad:

„Slažem se potpuno sa načelnikom vezano za te ljudske resurse, da treba riješiti. Ja mislim da su se počeli rješavati kvalitetno, međutim često puta sam govorio o našoj privrednoj strukturi u Stjepan Polju. Istina, načelnik je dao određeni dio materijala, kad smo pričali na prošloj sjednici, ali to je Spreča odnijela. Nebitna je dole zemljana površina i vjerujte načelniče da ljudi ne mogu obrati usjeve. Razvalile su se rupe, jednim velikim dijelom je Spreča odnijela, a to je nekih 5-6 dunuma i mislim da se sa nekih desetak, petnaest hiljada može riješiti i to dugotrajno. Jedan kvalitetan nasip i mi smo za nekih 4-5 godina riješili. Molim vas da to uvažite“.

Dedić Dino je ne izlazeći za govornicu u ime kluba zatražio pauzu u trajanju od petnaest minuta.

Nakon pauze, vijeću se obratio Hasić Ibrahim:

„Ja bih ovdje zamolio nas sve, a posebno one koji ne poštuju svoje odluke koje su donijeli, a mislim na to, ako se traži pauza od petnaest minuta i nekolicina kolega ide tamo, a nas većina ovdje, da ne kažem drugačije, kao ovce smo ovdje u sali i čekamo. Prema tome, molim vas da se malo uozbiljimo i da se malo disciplinujemo“.

Prešlo se na izjašnjavanje i Izvještaj o izvršenju budžeta Općine Gračanica za period 01.01. – 30.09.2014.godine je usvojen jednoglasno.

TAČKA 2

NACRT-BUDŽET OPĆINE GRAČANICA ZA 2015. GODINU.

Obrazloženje na Nacrt Budžeta je dao Općinski načelnik gosp. Nusret Helić:

“Nacrt budžeta je rađen u skladu sa Zakonom o budžetima u Federaciji BiH, smjernicama i ciljevima fiskalne politike Ministarstva finansija TK-a, te našom procjenom ostvarenja prihoda i rashoda za 2014. godinu, što je takođe u skladu sa Zakonom o budžetima. Odmah da napomenem, u nacrtu budžeta za 2015. godinu nema planiranih grant sredstava sem za Sokolušu i put za Lendiće, kako je to ranije dogovoreno i za što postoje odluke.

Novi Zakon je članom 49. regulisao da budžeti moraju biti realno planirani i da se u budžet uvrštavaju samo grantovi za koje je izvjesno da će se ostvariti (postoje odluke ili potpisani ugovori). Svi ostali grantovi, a nadam se da će ih biti, uvrštavaju se u budžet Odlukom načelnika, nakon što se ostvare ili pristignu u budžet. To je novina zbog koje ste vidjeli evo da je u nacrtu manji u odnosu na raniju godinu.

Iz nacrta ste vidjeli da je budžet Općine za 2015. godinu planiran u iznosu od 9.244.000 KM i to:

- prihodi u iznosu 9.244.000 KM
- primitci 40.000 KM
- izdaci 8.756.000 KM
- otpлата 528.000 KM.

Vidjeli ste iz ovoga primici samo 40.000,00 u odnosu na ovu godinu gdje smo imali negdje 1.600.000,00. To je ono što smo rekli nepoznanica dok se ne donesu odluke.

Ukupno planirani prihodi su manji u odnosu na 2013. godinu, za blizu 380.000 KM.

Grantovi su planirani u iznosu od 649.000 KM i vidjeli ste na što se oni odnose (samo ono što je poznato).

Izdaci su planirani u iznosu od 9.284.000 KM i to:

- tekući izdaci 6.885.500 KM
- kapitalni izdaci 1.870.500 KM
- otpлата duga 528.000 KM, odnosno za nešto više od 220.000,00 manje u odnosu na ovu godinu jer nam ističe posljednja rata za Sportsku dvoranu koja je otplaćena.

U kapitalne izdatke nisu ušli projekti koji će se direktno finansirati iz kredita Svjetske banke i to:

- sanacija korita Sokoluše 299.000 KM
- sanacija klizišta na putu Monj 146.250
- asvaltiranje puta Ograđenica-Prnjavor 192.000 KM
- sanacija kizišta Avdići u Škahovici 98.000 KM.

Takođe, u budžetu nisu planirana sredstva EIB-a po kreditu za vodosnabdijevanje, onaj dio koji ide iz kredita Svjetske banke jer ne prelaze preko budžeta samo su tamo ostale one naše obaveze po osnovu PDV-a i naše učešće 320.000,00 za neke projekte koji su navedeni.

Za sanaciju kuća, klizišta i elementarne nepogode planirana su sredstva u iznosu od 210.000 KM, kao naše učešće. Očekujemo sredstva donatora, te ćemo ih uvrštavati u budžet, kao što je rečeno Odlukom načelnika.

Uz budžet je priložen i dokument okvirnog budžeta za 2015. - 2017.godina, kako je to utvrđeno novim Zakonom o budžetima u Federaciji BiH.

Ono što je pred vama i što sam iznio je realna slika i budžet za narednu godinu. Znam da mnogi neće biti zadovoljni, nema nekih projekata, ali ćemo tražiti druge načine da neke kapitalne projekte ostvarimo kao i do sada kroz apliciranje na javne pozive i prema fondovima.

Predlažem da se o nacrtu obavi rasprava do 05. 12. kako bi imali vremena da pripremimo prijedlog za decembarsku sjednicu i zajednički se dogovorimo o nekim projektima. Moguće je da idemo i u zaduženje za neke projekte koji su veoma važni.

Za organizovanje javne rasprave, zadužena je Služba za poduzetništvo, lokalni razvoj i finansije. Evo toliko kao uvod, uz ovo da imamo dovoljno vremena da se dogovorimo, usaglasimo o nekim ključnim projektima sa kojima bi trebali biti zadovoljni“.

Učesnici u diskusiji su:

Fadil Mešić:

„Evo s obzirom da će Nacrt budžeta ići na raspravu imamo dovoljno vremena. Ja bih zamolio Općinskog načelnika da, s obzirom da je Općina osnivač JZU „Opća bolnica“, i do sad je načelnik, odnosno „Opća bolnica“ imala sluha za pomoć kod nekih sredstava, pa bih ovog puta zamolio, a i menadžment bolnice me zamolio da iznesem, a da načelnik u prijedlog budžeta stavi jedan hemodijalizni aparat koji košta odprilike oko 30.000,00 KM. Znači da to bude i zvaničan stav vijećnika i da bude u prijedlogu na decembarskoj sjednici Općinskog vijeća. Zakon je donešen, a Kantonalna skupština nije prihvatila JZU „Opća bolnica“, što znači da je i dalje Općina osnivač bolnice pa tako ima i obavezu da pomaže. Hemodijalizni centar u bolnici snabdijeva četiri Općine, aparati su stari preko petnaest godina, dole, pa da to imate u vidu i uzmete u obzir“.

Begović Rukija:

„Evo pošto sam malo gledala ovaj Nacrt i primjetila sam, da nema a rekla sam na prošloj sjednici da će iz Svjetske banke biti sanirano i klizište Ilidža, koliko se ja sjećam. Ovaj put vidim ovdje ga nema pa pitam šta je s tim?“

Općinski načelnik je dao odgovor, nakon čega je Rukija iznijela slijedeće: „Imamo rekonstrukciju puta zaseok Oštrikovac, imam informaciju i to ide isto sve. Pored toga imam inicijativu za sanaciju krova na školi u Sokolu. Ja sam aplicirala i prije dvije godine, u budžet da se uvrsti. Mi smo svi svjesni da Soko nema Doma kulture ni bilo koje ustanove i ovim putem vas sve pozivam da maksimalno damo od sebe. Ja znam da je oko 23.000,00 potrebno za sanaciju kompletnog krova, ali kad bi mi izašli u susret sa 15.000,00, pa bi nekim fondovima i nečim drugim pokušali maksimalno da izvučemo pare, a nešto bi i mještani dali. Imala sam priliku da budem u školi kada pada kiša i da je po pet-šest kanti stavljeno, djeca u dvadeset prvom vijeku, malo je ružna slika. Ja znam da škola pripada Ministarstvu obrazovanja TK, ali Vas molim ako je u našoj mogućnosti da išta napravimo da se maksimalno potrudimo. Zamolila bih ovom prilikom sve vas, znate da nemamo Doma kulture, ako nekad ne krenemo sa polaznom osnovom, tražimo projekat za Dom, da jednom za sva vremena i Soko dođe kao prioritet, jer zašto i naša mala djeca željna sporta i fudbala nebi imala salu u Sokolu, da ne dolaze u salu u Gračanicu. Ovaj put da uvrstimo projekat, pa zemljište, a drugi put za izgradnju ćemo tražiti neka sredstva. Toliko i pošto Vranovići nemaju svog vijećnika, zamolili su me da i njihovo kandidujem vodosnabdijevanje za MZ Vranovići od 40.000,00 KM, a Mirnes mi je rekao da je to već bilo u budžetu ali nije realizovano, kao i sanacija klizišta da bi se osposobio put da bude prohodan, 10.000,00 KM. I načelnice Mjesna zajednica Donja Lohinja, znate da oni rade na bušotini za vodovod, te me je moj kolega Šestan zamolio da se planira 40.000,00 KM jer bi to moglo riješiti i asfaltiranje puta Mujkanovac-Meraje. Oni su ovdje naveli 50.000,00 KM, uređivanje korita rijeke 10.000,00 i regularna sanacija klizišta koliko se može. Hvala“.

Vehid Osmanović:

„Klub vijećnika SDP-a će podržati ovaj Nacrt budžeta, a mi ćemo kroz javnu raspravu imati nekoliko primjedbi i dodataka. Moramo se ipak konsultovati sa građanima koje zastupamo. Drugo zahvalio bih se načelniku što je već načeo ideje koje sam ja već par puta ponavljao, da mi sagledamo do usvajanja budžeta koliko je to naših stanovnika ostalo bez domova, koliko kuća trebamo napraviti. I da zaista svim tim ljudima obezbijedimo krov nad glavom kreditnim zaduženjem. Mislim da ovako parcijalno ulaganjem po dvije, tri hiljade, utrošit ćemo sredstva a nećemo riješiti do kraja. O tome zaista sve stranke treba da razmisle u ovih tridesetak dana i na narednoj sjednici. Mene neće biti ali da vi to usvojite jer je u interesu naših građana da im se obezbijedi dom“.

Senad Selimović:

„Nadam se da će svi projekti predviđeni Nacrtom budžeta Općine Gračanica za 2015. godinu biti realizovani. Posebno da će biti izgrađena šehidska spomen obilježja u Donjoj Orahovici i Miričini. Vidim u Nacrtu budžeta Općine Gračanica za 2015. godinu za Mjesnu zajednicu Trnovci predviđeno je za vodosnabdijevanje 5.000,00 KM. Ne znam postoji li mogućnost načelnice, da se još nekih 5.000,00 KM uvrsti. Kažem, ukoliko postoji mogućnost da se uvrsti u budžet za 2015. godinu. Zatim ovdje su predviđena sredstva za izgradnju Društvenog doma, odnosno Mjesnog ureda u MZ Trnovci, nekih 10.000,00 KM. Mi imamo za 2014. godinu 10.000,00 KM predviđeno. Ukoliko znači ne bude realizovano, najvjerovatnije ta će sredstva biti prebačena za 2015. godinu. Pa ukoliko postoji mogućnost da se još nekih dodatnih 5.000,00 KM uvrsti u budžet za 2015. godinu. Zatim, mi imamo asvaltiranje ceste od Trnovaca prema Prokopu, prema Međidi srednjoj odnosno Gradačcu nekih 20.000,00 KM. Postoji još jedan zaseok koji nema izgrađenu javnu rasvjetu, pa možda planirati nekih 5.000,00 KM da bi se isto moglo riješiti. To je što se tiče Trnovaca. Što se tiče ovdje Gornjih Doborovaca, nadam se da će ovi projekti koji su predviđeni u Nacrtu, da će biti realizovani. Takođe imam ovdje napisano asvaltiranje puta Džanani-Serhatlije u nekom iznosu od 90.000,00 KM, vodovod Hodžići 30.000,00 KM. Što se tiče Doborovaca, odnosno Donjih Doborovaca, ovdje vidim da su predviđena sredstva za izgradnju tribina na poligonu malih sportova, asvaltiranje puta prema Panđurištu. Vidim da je i to uvršteno. Ostalo je znači izgradnja rezervoara za vodu vodovod Vilakići. Ja mislim da su oni Vama i dostavili 24. 10. 2014. godine zahtjev sanacija oštećenja na asfaltnom putu prema Džakulama prouzrokovani klizištima, ispod Monja do zadnjih kuća i na Cerićima ispod spomenika. I tu bi trebalo nekako sanirati taj dio ceste. Asvaltiranje puta za Aliće u dužini 500 metara, neke predračunske vrijednosti do 45.000,00 KM. Sanacija mosta za ambulantu i izbjegličko naselje i tamo bi trebalo nekako sanirati most prema izbjegličkom naselju. Pokretanje istražne radnje na pronalaženju dodatnih količina pitke vode za MZ. Asvaltiranje puta za zaseok Rudina, od raskrsnice regionalnog puta sa putem za Džakule u dužini od 300 metara. I ovdje piše nabavka i postavljanje ogleđala za bezbjedan izlazak na nepreglednom mjestu u Džakule iz naselja Alići kod mezarja. Eto toliko. Mi dajemo neke sugestije, prijedloge, pa vidjet ćemo i u toku javne rasprave koliko će toga moći biti i ostvarivo“.

Mirza Omerdić:

„Vezano za Nacrt budžeta, iz MZ Stjepan Polje su dostavili, ja vjerujem i Općinskom načelniku, zahtjev za rekonstrukciju jednog dijela puta u jednom dijelu Stjepan Polja koji se zove Džebe. Ja sam obilazio to područje, i u vrlo lošem je stanju. Njihova kanalizacija nije uređena, i oni su dostavili i meni kao Općinskom vijećniku, pa evo ja bih pročitao ono što su oni tražili ili zahtijevali: Obraćamo Vam se sa zahtjevom za uvrštavanjem projekta „Rekonstrukcije i asvaltiranja puta u zaseoku Džebe MZ Stjepan Polje“ u Nacrt opštinskog budžeta za 2015. godinu. Radi se o zaseoku sa preko 60 stambenih jedinica i preko 200 stanovnika gdje su stambeni objekti najvećim dijelom povezani makadamskim putevima koji su u izrazito lošem stanju. U više navrata smo skupljali dobrovoljne priloge i posipali navedenu dionicu puta, međutim nakon ovogodišnjih poplava i bujica putevi su u tako lošem stanju da ih je nemoguće urediti bez adekvatne rekonstrukcije i asvaltiranja. Ukupna dužina puta, direktno vezanog za stambene objekte, predviđena za rekonstrukciju iznosi 500 m. Dana 21.10.2014. godine mještani su održali Zbor građana i jednoglasno odlučili da se formira inicijativni odbor koji će pružati daljnje aktivnosti oko realizacije projekta. Na osnovu toga urađen je predmjer i predračun radova čiju kopiju dostavljamo u prilogu akta. Predmjer i predračun radova obuhvaća rekonstrukciju puta dužine 500 m i svođenje oborinski voda duž navedene dionice odnosno ucjevljenje kanala sa jedne strane puta. Ukupna cijena radova prema urađenom predračunu iznosi 88.303,99 KM. Na istom Zboru građana mještani su se izjasnili za realizaciju projekta i svojim potpisima obavezali da prikupe obavezna novčana sredstva u visini od 20 % ukupne cijene radova kao dio sufinansiranja projekta. Ne treba napominjati da su mještani zaseoka Džebe učestvovali u svim dosadašnjim akcijama koje su provođene u našoj MZ, da smo dali neizmjeran doprinos u odbrambeno oslobodilačkom ratu 1992. do 1995. godine, da smo naselje u MZ sa najvećim brojem poginulih boraca u navedenom ratu i da

smo naselje u MZ sa najvećom dionicom makadamskog puta direktno vezanog za stambene jedinice. Od Vas očekujemo da uvažite naš zahtjev za rekonstrukciju i asvaltiranje navedene dionice puta, na osnovu gore navedenih činjenica, te uložite maksimalne napore kako bi se projekat uvrstio u Nacrt budžeta opštine Gračanica za 2015. godinu. Smatramo da je došlo krajnje vrijeme da se uradi rekonstrukcija navedenog puta i da se mještanima naselja Džebe omoguće jednaki uslovi življenja kao i svima drugim. To je jedan zaseok koji ima dosta makadamskog puta, ima da kažem otvorenu kanalizaciju, zbog čega postoji velika vjerovatnoća da dođe i do inficiranja, odnosno do zaraze i mislim da je to i jako veliki prioritet. Ja evo i načelnika i opštinske službe nadležne, molim da pronađu ova sredstva, koliko je to u mogućnosti i da se da doprinos u asvaltiranje ovog puta. U Stjepan Polju pored toga postoje dvije sjeline odnosno dva klizišta, koja su, da kažem tako sanirana i ona su prohodna u lijevoj i desnoj strani pa ukoliko bi u okviru općinskog budžeta postojala mogućnost da se izdvoje neka sredstva za dalju sanaciju, s obzirom da je Mjesna zajednica Stjepan Polje istrošila mnogo novca kako bi sanirala ove posledice poplava u prethodnom periodu. Ne znam koliko je Općina participirala tu, mislim da je Mjesna zajednica to sve snosila. Dakle, vrlo teška situacija, treba nastaviti radove, ali u budžetu MZ vrlo teško pronalaze sredstva. Evo ja bih molio u ime Mjesne zajednice Stjepan Polje da u okviru Nacrta budžeta se uvrste znači i ove stavke, plus ovo što je kolega Esad Tursunović govorio vezano za ovo poljoprivredno područje. Zbilja je teška situacija i tih desetak ili petnaest hiljada bi možda spasilo znatno veću vrijednost tih nekakvih usjeva. Mislim da bi i tu trebalo naći mogućnost da se i taj dio završi“.

Topčagić Mirzet:

„Ja bih htio da se pridružim inicijativi, odnosno prijedlogu kolegice Begović, što se tiče rekonstrukcije krova Osnovne škole u Sokolu. Bio sam gore u školi i uvjerio se u stanje, tako da zaista iz godine u godinu šteta je sve veća, i već otpadaju komadi maltera sa zidova, a to je jedini objekat u kojem se održavaju skupovi, manifestacije, što je kolegica već rekla. Takođe sam obavio sastanak sa direktorom Osnovne škole i od njega sam tražio da mi da projekat i predračun firme „Limorad“ po čijem predračunu radovi koštaju 23.600,00 KM i sve sam to skupa u saradnji sa kolegom Krajinovićem prosljedio do Federalnog ministra obrazovanja, kulture i sporta. Obratio sam se sa zahtjevom da pokuša pomoći sa bilo kojim iznosom. Čak postoji i velika volja građana koji su spremni da svojim ličnim doprinosom učestvuju u tome, i zaista nas sve molim da pokušamo sa nekim iznosom to da predvidimo u narednoj godini“.

Rahim Gadžić:

„Evo ja ću nekoliko primjedbi i prijedloga iznijeti, a dolazim iz mjesne zajednice koja je zadnjim elementarnim nepogodama najviše ugrožena i pogođena sa klizištima, poplavom itd. Znajući da glavni put od Trnovaca do Prijekog Brda je na više mjesta u prekidu i uništeno je i ono malo asvalta što je bilo, vidimo da u Nacrtu budžeta nismo zastupljeni onoliko koliko sam ja razmišljao. Razmišljao sam da će ipak one mjesne zajednice koje su najviše stradale da im treba dati veći dio određenih sredstava, da se vrate na onu mjeru kakvi su putevi bili prije poplava. Znajući da je i Monj u kritičnoj situaciji, mi imamo alternativni put koji je od škole u Prijekom Brdu prema Serhatlijama i Bukva, i većinom ga građani koriste u zadnje vrijeme kao takav za dolazak u Gračanicu. Udaljenost od Osnovne škole u Prijekom Brdu do Općine Gračanica je 11 kilometara i 200 metara. U slučaju da se zatvori Monj mi bi trebali preko trideset kilometara preći da dođemo do Općine Gračanica. Iz tog razloga ja bih u svoje lično ime i u ime građana Mjesne zajednice Prijeko Brdo tražio da se na tom putnom pravcu doznače sredstva da bi mi ipak mogli taj putni pravac koristiti za dolazak prema Općini i ako dođe do konstrukcije Monja mi moramo koristiti taj alternativni put. Mi smo u prošlom periodu radili prosjek tog puta, raširili smo put jer smo znali da će doći vrijeme da će taj putni pravac biti glavni putni pravac za MZ Prijeko Brdo prema Općini Gračanica. Kad je u pitanju MZ Džakule evo vidimo, nekoliko godina MZ Džakule u budžetima što se tiče njihovih projekata, oni su jako siromašni i malo se nešto realizuje. Iz tog razloga ja tražim da se uvrsti nova stavka u budžetu i to asvaltiranje puta Centar-Selo u MZ Džakule. I MZ Buk evo godinama ima urađenu projektnu dokumentaciju, spajanje sa vodovodom

koji od Gradačca napaja Biberovo Polje. Urađena je sva projektna dokumentacija, sve je spremno i oni imaju nešto sredstava i mi tražimo da se taj projekat uvrsti u ovaj budžet i da bi smo u narednoj godini taj projekat priveli kraju. Načelnik je upoznat oko tog projekta i zna šta je u pitanju. Evo iz tog razloga ove tri stavke bih tražio da se uvrste u budžet, prema mogućnostima, da sad ne tražimo ogromne sume novca, nego da načelnik procijeni koliko je to moguće realno sredstava dati za ove projekte“.

Esma Pašić:

„Ja bih samo da postavim jedno pitanje. Da li postoji mogućnost vezano za potok iznad Hadžijine vode, a to je ulica Hajrudina Džebe Bajbage, ako može da se uvrsti u budžet i ako postoji mogućnost da se on sanira jer je to bio i jedan od zaključaka koliko se sjećam na vanrednoj sjednici koju smo imali 18. septembra 2014. godine. Zaista su nanešene ogromne štete u toku polava u ovom zadnjem periodu koje su se dogodile u tom području, a time bi istovremeno uspjeli da riješimo površinske i oborinske vode. I drugo što bih isto željela da kažem, to je put u Potok mahali, zvana Japaga, pa ako postoji mogućnost, u dužini od 70 metara, da se i to uvrsti u budžet“.

Edin Ibrišević:

„Evo ja bih na kraju postavio jedno pitanje. S obzirom da u Nacrtu budžeta nije predviđen put Stjepan Polje, Crkvine a bio je u budžetu i građani su skupili dio sredstava koji je potreban kao učešće građana, da li će taj put biti realizovan možda ove godine, jer evo nije predviđen za narednu godinu, a došlo je do izgradnje pola puta, urađena je podloga, pa ako ima odgovor da se da“.

Općinski načelnik Nusret Helić:

„ Ja neću u smislu davanja odgovora, nego da kažem, objektivno ovo što iznosite, to su potrebe i mi ćemo njih tretirati kao dio javne rasprave i dobro bi bilo da ih uz Nacrt dostavimo prema mjesnim zajednicama, tamo će se voditi rasprava i da ljudi znaju da su pokrenute, jer vjerovatno će se ponavljati neke stvari. Ovo što ste iznijeli i nešto što ćemo u ovo mjesec dana iznositi i predlagati projekte, otvara mogućnost zaista ili potrebu da krenemo u ono što sam ja na početku rekao, oko neke vrste kreditnog zaduženja. Probat ćemo to zaista izanalizirati i kroz javnu raspravu doći nakon ovih prijedloga do rješenja u smislu da idemo na neko zaduženje, da bi završili. Dešava nam se da projekat počnemo u pola i stanemo, onda jedna godina prođe, nismo ga planirali pa i ono što smo uradili nestane ili se pokvari. Tako da zaista ima potrebe da se sastanemo i u okviru klubova i nakon prvih petanest dana rasprave da pokušamo doći do ključnih projekata i do ovog rješenja hoćemo li ići u neko zaduženje ili ne. Za ove neke, oni su u okviru neke stavke npr. Bajbagin potok. Uradili smo projekat i nešto će se već sad raditi. Dakle, ide taj projekat. Put Japaga, je saniran nužno, riješeno pitanje odvodnje, to u okviru stavke renta u gradu je planirano za narednu godinu da se obnovi. Crkvine su dio čini mi se budžeta ove godine, ako ne uspijemo završiti prenijet ćemo ga kroz ove rasprave, a Nacrtu u slijedeću godinu. Imamo dakle taj mjesec dana rasprave, sve će se službe uključiti, neće biti lako sve staviti u budžet. Vidjeli ste da je potrebno tražiti i mišljenje ministarstva. Dobili smo ga na ovakvu projekciju prihoda. Moglo je biti i negativno da smo išli onim sistemom, da smo planirali neke grantove, oni su upoznati. Ali imamo šansu da kroz raspravu dođemo do nekih drugačijih mišljenja“.

Predsjedavajući Vijeća je definisao zaključak koji glasi:

Usvaja se Nacrt Budžeta Općine Gračanica za 2015. godinu.

Nacrt Budžeta Općine Gračanica za 2015. godinu, stavlja se na javnu raspravu u trajanju do 05. 12. 2014. godine.

Javnu raspravu će provesti Služba za poduzetništvo, lokalni razvoj i finansije u skladu sa Odlukom o javnim raspravama u Općini Gračanica („Sl. glasnik Općine Gračanica“, broj: 5/04).

Sve primjedbe, prijedloge i sugestije mogu se dostaviti nadležnoj službi ta provođenje javne rasprave i Stručnoj službi Vijeća do 05. 12. 2014. godine.

Zaključak je usvojen jednoglasno.

TAČKA 3

NACRT- ODLUKA O IZVRŠAVANJU BUDŽETA OPĆINE GRAČANICA ZA 2015. GODINU.

Nije bilo učesnika u diskusiji pa predsjedavajući Vijeća definisao je zaključak:

Usvaja se Nacrt Odluke o izvršavanju Budžeta Općine Gračanica za 2015. godinu.

Nacrt Odluke o izvršavanju Budžeta Općine Gračanica za 2015. godinu, stavlja se na javnu raspravu u trajanju do 05. 12. 2014. godine.

Javnu raspravu će provesti Služba za poduzetništvo, lokalni razvoj i finansije u skladu sa Odlukom o javnim raspravama u Općini Gračanica („Sl. glasnik Općine Gračanica“, broj: 5/04).

Sve primjedbe, prijedloge i sugestije mogu se dostaviti nadležnoj službi za provođenje javne rasprave i Stručnoj službi Vijeća do 05. 12. 2014. godine.

Zaključak je usvojen jednoglasno.

TAČKA 4

ODLUKA O PRIJENOSU PRAVA VLASNIŠTVA NA NEKRETNINAMA U VLASNIŠTVU OPĆINE GRAČANICA.

Uvodno obrazloženje je dao Općinski načelnik:

„Evo ja kad sam predlagao ovu tačku da se stavi na dnevni red i rekao sam šta je razlog da danas uvrstimo ovu Odluku. Poslije donešenog zakona na nivou Federacije kojima je omogućeno da se građevinsko zemljište u državnoj svojini može dodjeljivati za izgradnju porušenih objekata, mi smo proveli sve procedure, od raspisivanja konkursa, izbora, hvala bogu bilo nam je lakše jer smo imali dvanaest placeva, i davanaest je i konkurisalo, tako da smo ispoštovali sve kriterije. Rekao sam kako smo došli do toga koji plac kome dodijeliti. Bitno nam je da su se ljudi složili na sastanku koji je bio kod mene. I ostavljena im je i dalje mogućnost ako se neko međusobno može dogovoriti još oko zamjene, i to mi možemo, što kažu kroz Vijeće parafirati. Ima ono, neko bi volio do nekog da gradi sve će biti besplatno, dakle kompletna dokumentacija, niko neće praviti bez građevinske dozvole. Rekli smo im da podnesu zahtjeve za građevinsku dozvolu, mi ćemo obezbijediti projektnu dokumentaciju i sve ostalo. Ono šta smo se i mi, odnosno što smo bili u nedoumici, da li ići tamo sa tipskim projektom. Onda su nam ljudi koji će praviti kuće rekli, ja imam materijal, imam prozor od kuće koju sam skoro napravio, pa da prilagodimo da iskoriste taj materijal i to je dobro. Rekli smo, vi ćete podnijeti zahtjeve prema svojim željama, a služba će uraditi takve projekte, nema zakonske smetnje neke veće ako se izmijeni. Rečeno mi je da mogu dobiti sredstva do 37.500,00 koliko su nekakvi standardni, da kažem evropski, za pomoć ljudima koji su ostali bez kuće. Neki su izgubili kuću vrijednu 100.000,00 KM, a neki uz drugu vrijednost, ali ono što je pomoć to je do toliko para. Složili su se, bitno nam je to. Zato sam vam rekao da su ljudi otišli zadovoljni, postigli smo dogovor i vjerujte da će se brzo pristupiti i prosijecanju ovog puta da ljudi krenu, jer neki kažu da već mogu saliti temelje i krenuti dalje. Sve je u skladu sa zakonom i predlažem da danas usvojite i da službe krenu sa procedurama“.

Za diskusiju se javio Almedin Devedžić:

„Evo ja ću vrlo kratko, načelnik je sve rekao vezano za ove placeve i želim da izrazim zadovoljstvo što je napokon se krenulo sa tim aktivnostima i što je ta dokumentacija završena i ako bogda da krenemo sa izlivanjem prvih temelja. Nadam se da će se pronaći i sredstva za sve i načelniče ja bih Vas zamolio posebno kad je u pitanju taj put da se što prije krene u tu aktivnost i može se to brzo uraditi. Ne treba tu dosta sredstava, da stručne ekipe izađu, da se razmjeri zemljište,

da se nadoknadi onom ko je izrazio želju da to proda. To je vrlo malo kvadrata tako da će najveći dio zemljišta biti školski i planirano je to da ide u taj put. Ipak život i rad škole je jedno, a potrebe ovih ljudi koji će tu imati kuće je drugo. Toliko i hvala“.

Odluka o prijenosu prava vlasništva na nekretninama u vlasništvu Općine Gračanica je usvojena jednoglasno.

TAČKA 5

ODLUKA O PROMJENI STATUSA NEPOKRETNOSTI U OPŠTOJ UPOTREBI (K.O. GRAČANICA).

Nije bilo učesnika u diskusiji i Odluka o promjeni statusa nepokretnosti u opštoj upotrebi (k.o. Gračanica) je usvojena jednoglasno.

TAČKA 6

ODLUKA O PROMJENI STATUSA NEPOKRETNOSTI U OPŠTOJ UPOTREBI (K.O. MALEŠIĆI).

Nije bilo učesnika u diskusiji i Odluka o promjeni statusa nepokretnosti u opštoj upotrebi (k.o. Malešići) je usvojena jednoglasno.

TAČKA 7

RAZRJEŠENJE I IMENOVANJE ČLANA I PREDSJEDNIKA KOMISIJE ZA BUDŽET.

Nije bilo učesnika u diskusiji i Rješenje o razrješenju je usvojeno jednoglasno, kao i Rješenje o imenovanju člana i predsjednika Komisije za budžet.

TAČKA 8

AŽURIRANJE PROGRAMA KAPITALNIH INVESTICIJA OPĆINE GRAČANICA 2010. – 2014. GODINA, U 2014. GODINI.

Nije bilo učesnika u diskusiji i Ažuriranje programa kapitalnih investicija Općine Gračanica 2010. – 2014. godina, u 2014. godini je usvojeno jednoglasno.

Vijeću su se obratili Vehid Osmanović i Mirza Omerdić, novoizabrani poslanici u Skupštini TK koji su se zahvalili Vijeću, odnosno svim članovima Općinskog vijeća na korektnoj saradnji.

Na kraju se Vijeću obratila Larisa Šuša predstavica „Plenum“ Gračanica i iznijela slijedeće:
„Mi imamo par zahtjeva:

Zahtjev građana MZ Gračanica. Molimo Vas da nam u što kraćem mogućem roku po pitanju građanske inicijative upućene od strane „Plenum“ Gračanice po pitanju smjene predsjednika MZ Gračanica. Ukazali smo na bahato ponašanje gospodina Harisa Čajića koji od majskih poplava još nikada nije sazvaio Vijeće MZ Gračanica. U narednom periodu u okviru mjesnih zajednica doći će do razmatranja Nacrta općinskog budžeta, smatramo da se iz navedenog razloga što prije Vijeće MZ Gračanica mora sazvati, kako bi se što kvalitetnije organizovala javna rasprava, kao i razmatranje druge problematike prisutne u MZ Gračanica.

Zatim, molba za predsjedavajućeg.

Poštovani predsjedavajući molimo Vas da se predsjednicima mjesnih zajednica uputi specijalni dopis i APEL da se maksimalno posvete javnim raspravama o Nacrtu budžeta za 2015.godinu i na što efikasniji način sazovu građane svojih mjesnih zajednica kako bi rasprave bile što bolje napravljene. I pored radio poziva građani ne saznaju na vrijeme o vremenu i lokaciji održavanja javnih rasprava. Molimo Vas da nam se dostavi spisak i dinamika održavanja javnih rasprava (vrijeme, datum i lokacija).

Pitanje člana „Plenuma“ Gračanice, gospođa Kasima Đulić.

Dobili smo molbu da u ime naše članice „Plenum“ Gračanice Kasime Đulić, u ime radnika Grafopaka, zahvaljuje se gospodinu Safetu Pjaniću za regulisanje zdravstvenog osiguranja uposlenika Grafopaka. Gospođa Kasima uputila je i pitanje dali postoji okvirno bilo kakva mogućnost rješavanja situacije u ovoj firmi iako rješavanje pitanja iste nije u nadležnosti ovog Vijeća ili izvršne vlasti. Dali je problem razmatran na Klubu vijećnika i kakav je stav Kluba vijećnika?

Poštovani načelnice, dali postoji mogućnost produženja roka za prijavu po objavljenim konkursima za naknadu štete pogođenim od elementarnih nepogoda. Smatramo da je relativno kratak rok za popunjavanje prijavnih obrazaca i prilaganja potrebne dokumentacije za oštećene građane. I pored objave konkursa u štampi na stranici Općine i Radio Gračanici ipak postoji veliki broj građana koji nisu informisani o objavljenim konkursima. Molimo Vas da se ovi rokovi produže.

Zahtjev za financijsko sankcionisanje dijela općinskih vijećnika.

Poštovani predsjedavajući, vijećnici i sekretaru se upućuje. Molimo Vas da se što prije napismeno ukorom i financijski sankcionišu svi općinski vijećnici koji su na prošlom sazivu Vijeća napustili sjednicu ranije ne saslušavši zahtjeve, inicijative i pitanja građana. Smatramo da su tim činom pokazali direktno nepoštovanje prema svojim građanima.

Napomena: „Plenum“ Gračanica podržava aktivnosti oko rješavanja pitanja prilaznog puta kući Šemsudina Hajdića koji je i aktivista „Plenuma“.

Sjednica je završena u 13,45 sati.

Zapisnik vodila: Mevlida Naimkadić

Tonski snimak sjednice uredno je arhiviran.

ZAPISNIK VODILA:

Mevlida Naimkadić

PREDSJEDAVAJUĆI
OPĆINSKOG VIJEĆA
mr. sc. Edin Ibrišević